

محمد ضباشه

ياقلبي لا تحزن



الغلاف بريشة الفنانة منى محمد حسنين
نجلة الشاعر محمد ضباشه

أشعار بالعامية المصرية

بطاقة الكتاب

عنوان المؤلف : يا قلبى لا تحزن
المؤلف : محمد ضباشه
التصنيف : أشعار
رقم الإيداع : 2018-15658
الترقيم الدولى : 978-977-6656-57-9
عدد الصفحات : 110 صفحة
رقم الإصدار الداخلى: 233 (الطبعة الأولى سبتمبر 2018)
تصميم الغلاف : الفنانة منى حسنين
الإخراج الفنى : الشاعر محمد الساعى
جميع حقوق الطبع والنشر محفوظة للشاعر، ولا يحق لأى دار نشر طبع
ونشر وتوزيع الكتاب إلا بموافقة كتابية وموثقة من الشاعر

دار النيل والفرات للنشر والتوزيع

ثورة مصرية تشرق إبداعاً على الوطن العربي

رئيس مجلس الإدارة

ناجى عبد المنعم



رخصة مزاولة مهنة: 58365 - سجل تجاري: 13242 / 2017 - بطاقة ضريبية: 01-35-572

عضو عامل باتحاد الناشرين المصريين رقم 941 لسنة 2018

هاتف: 01011256943 - 01116202218 - 01202541192 تليفاكس: 020554372901

البريد الإلكتروني: alnilwaalfourat@gmail.com [alnilwaalfourat](https://www.facebook.com/alnilwaalfourat) [alnilwaalfourat](https://www.instagram.com/alnilwaalfourat)

المقر الرئيسي: ج.م.ع. محافظة الشرقية - العاشر من رمضان - مجاورة 13 - امام سنترال 13 - عقار 304

ج.م.ع. محافظة المنيا - أبو قرقاص - شرق القرنة - خلف محطة السكة الحديد - هاتف 086214428

ج.م.ع. محافظة القليوبية - مركز طوخ - إيمى - هاتف 0132424735

(الفروع)

قبل أول قصيدة

مثلث الهبة والموهبة والإرادة إشكالية قتلها الفلاسفة
والباحثون بحثا وانتهوا إلى حقيقة واحدة " كل إنسان يُخلق
ومعه الهبة التي تتجسد في الشكل والجسم ويُمنح المبدع
الموهبة التي تميزه عن غيره ثم يضيف هو الضلع الثالث
الإرادة ليكتمل المثلث


والشاعر محمد ضباشه دُلّ وبرهن على هذا التطور من
خلال ديوانه (ياقلبي لا تحزن) فتعامل مع الموهبة ليقدم لنا
كتابه الرائع وبالإرادة استطاع أن يلوى عنان اللفظة
ويوظفها كيفما شاء في كل مواضع الكتاب مستخدما أدواته
من لفظة وموسيقى خارجية وداخلية وصور شعرية بسيطة
ومركبة واختيار موضوعاته بدقة متناهية حتى أنه يبنى
النص الشعري على لفظة واحدة قد تتصاعد فيما بعد إلى
قضية كبيرة وإشكالية أكبر يدفعنا دفعا للتواصل معه ايجابيا
وفي النهاية نقدم كتابا قيما للمكتبة العربية

الشاعر الناقد

ناجى عبد المنعم

الإهداء

أهدى ديوان يا قلبي لا تحزن
إلى نجلتي الفنانة التشكيلية
منى محمد حسنين



محمد ضباشه

العيون دي مصرية

العيون دي مصرية
من قلبي شداني
في رموشها حنية
بالحب ضماني
وهبه الحياة ليا
علي البسمة رسماني
فارس علي مهرة
بورودها زفاني
لا العين تزوغ برة
ولا كدبة علي لساني
ولا الهجر يعرفنا
ولا دمعة ملكاني
أن ظل يوم خوفنا
ألقاها شداني
تطبطب علي وجعي
تطيب في أحزاني
يجف ألم دمعي
تطرح في بستانني
ثمار من الجنة
علي حنة رباني

معاها أتهني
وأرتاح بإيماني
بأن الحب نعمة
مع قمره شرياني
مع قلبي متواعده
بتجري في شرياني
ليلها بميت شمعة
تنور في أركاني
أنسج لها الغنوة
تعزفها بألحاني
ونهارها ولا فلة
بنداها سقياني
كل كاسات الرضا
وعلي جناحها حاملاني
أحفر لها علي الفضا
ثمثال ذهب تاني
والأول ينده لها
يا حبيبتي وحشاتي

لو ما فيش غيرك حبيبي

لو ما فيش غيرك حبيبي

يبقي باقي الخلق أيه

وأما تهرب من نصيبي

ألقي مين يمسح عينيه

وأنت مش ويايا راسي

ودايما علي قلبي قاسي

وبالمحبة ناسي كاسي

وبهجرك تغضب عليه

لو ما فيش غيرك حبيبي

يبقي باقي الخلق أيه

كنت بين الرمش سندي

كنت شمعي وكنت بدري

كنت لما أشتاق لقربك

ما شيء يخلف ظنوني

كانوا كل الخلق بعدك

وأموت لو يوم في بعدك

أمسح الدمعات بخدك
وأوعى تبعد وتجافيه
لو ما فيش غيرك حبيبي
يبقى باقي الخلق أيه
يبقوا ضي في عينيك
بالنهار أمشي في ضله
يبقوا لمسة من إيديك
يبقوا بستانه وخله
يبقوا كل حاجة فيك
يبقوا أشواق بتناديك
تحضن الباقي في حياتي
وتداوي الجرح اللي فيه
لو ما فيش غيرك حبيبي
يبقى باقي الخلق أيه
تبقي في السهرة مرايتي
تختار لي فستان وشال
ترسم الكحل بحكايتي
لما حن القلب مال
وكنت مهرة بدايتي
ليه نهايتي هواها سال

مهما تبعد راح أقرب
وأمشى ويا الدمع ليه
لو ما فيش غيرك حبيبي
يبقي باقي الخلق أيه



يا حته منى

يا حته منى وغصب عني
مطلعة روعي
يا ساكنة القلب والنني
وسر حروف بوعي
أكتبك علي السطر غنوة
وأغنيها بالموال
وأرسمك ورد الجنانين
وأغزله عقدين وشال
وأحفرك في القلب سكن
واصل لشريرياني
أنا فيا أيه تاني
علي غصنك ما حاله مال
بنيت لك علي رموشي هرم
هرم قلبي ولا سكنوش
وبير الوصال إتردم
جريت وما لحقتوش

وكل ما داوي جرح
أرجع أتجرح ثاني
خلصت شموع الفرح
والطرح بكاني
لو كان لقلبي مكان
ليه بس بيعاني
ولا أنت خلاص بايعة
ورايحة لزمن ثاني
حرمت أنا منك
وحرمت عينيا النوم
شاري ولكنك
زارعة نهاري هموم
بطلت معاك العتب
درج العتب عالي
وأنا من كتر التعب
بسحف بأحمالي
قوليلي كيف أوصلك
وأوصل مع الواصلين
ولا أشيل الطين
وتقوللي وأنا مالي



الظلم موضة عصرنا

ما أبكيش أنا
ولا أظاطي ذل للضني
مهما الأيادي المرعبة
تمحي حلول المسألة
وتلف دايرة بمنقلة
تخنق جنين الروح
ما يعدي صبره للهنا
لكن صراخي ما يتخمد
ويهز عرش المستحيل
يللم جراح اليوم
ينهض كما الغنيتل
ويصحي فجر الضمير
يمسح دموع الليل
وينسج الآمال مناديل
تعصب جروح البوح
صحيح بهد الحيل
لكن إيمانه بكلنا
نبدرها تقوي في القلوب

نجنّيها رحمة علي الطريق
ونمحي عن الحلم الغروب
ونكسر حيطان الضيق
ما هو كان برئ لما إتعدم مظلوم
والقسوة سرحت في الغيطان
وفي نبتها بتعوم
بتلومنا ليه لما أتعدم
بحبل خوفنا وصمتنا
يا ربنا
قوي اللي باقي منّا
يعدينا لبكرة بسلام
هرب الحمام من ضعفنا
لما سلامه إنضام
صحيت خفافيش الظلام
تسرق شقانا وعمرنا
ومن جهلنا
عشنا كما الأيتام
بظلم موضّة عصرنا

أطلق سراح الخيال

سارح خيالي في الفضاء
يقلبها شمال ويمين
في الحاضر واللي مضي
واللي إنقضي
واللي بدا
خلي النجوم تايهين
من درب لدرب لحرب
لسكة مقفوله
معقولة يموت الدماغ
ويرجع خيالي سجين
يحلف بألف يمين
أن في حزن السراب
عقول كثير شاردين
وخيالها متغمي عينية
ماشى علي عكاز
ومسلسلين الإيدين

بالكذب والألغاز
عاشين كمالة عدد
وسندهم كاسات الصبر
يا جبر هد جبالك
وخذنا معاك باللين
لملم نجوم السما
وألضمها في عقد ياقوت
وأطلق سراح الخيال
يمكن يلاقي القوت
وعدي علي أفكارنا
أو قول لها سلامات
تعدني باب دارنا
وتبطل الإشاعات
إن خيالي رجع
بنعيم من السرايات
وهو يومه وقع
بيمد يده ما ليه
فليه ترمونا عدد
في كل نقرة وبير
نمضغ جبال الزلط

وننام في هم الليل
وفكر الشواشي إتقرط
بمنجل ما هو شايف
خايف عليك يا وطن
ما نكون معاك شايلين
فارد جناحي أمل
والدفة حلم جميل
تدور سواقي العمل
تبدر رضا علي النيل
يوصل لحد الترع
ولكل شق في غيط
كفاية يا أهل الزيت
الزفة والتهليل
فرعنوا ليه الحال
ومحيتوا كل جميل

سمات العصر

شادد حزام الجدعة
مع كل شدة وضيق
لا الوش عليه مسكنة
ولا بيعادي أي صديق
فارد شراعي هنا
والحب في الأباريق
رافع عينيه في السما
يطفي في قلبي حريق
توب الرجولة أدب
متفصل علي جسمي
لا مرة قل في أدب
ولا غير خطوط رسمي
سالك طريق العتب
مهما الكلام داسني
أقول مسير الليل
يظهر في توبه بريق
بقي خلاص الهوي
جوة الصدور خائق

لا عاد يفيد الدوي
في قلوب بتتخاق
نسيت زمان أنها
كانت بتتعانق غضبها بيشلها
وتحدف كلام ما يليق
قلت المسامح كريم
وكرمه زاد فيا
لبس عبايتي اللقيم
وقرب تاني ليا
رمانى في بحر سقيم
مربوطه رجليا وأنت يارب عليم
تفرجها خلاص م الضيق
أرجع لأصلك وفصلك
لو كان لتوبك أصل
دا الود كان لك
قطعت حباله بنصل
ومهما أنده لك ترد بقلة أصل
وبقت سمات العصر
وأنا والله منها برئ

كنت فين ؟!

كنت فين
لما الليالي عذبتني
كنت مين
لما شموسك غربتني
كنت حب وكنت قلب
كنت حزن ولما درب
دوست ليه علي كل باقي
وقتل الشوق والحنين
كنت فين أو كنت مين
لما لونت الأنين
كنت شجرة الجذع مايل
أعدله يرجع يميل
تنسي أن الحب آيل
للسقوط ويبات عليل
كنت زي غزالة شاردة
كنت شوك ما يحمي وردة
كنت خوف في ليالي باردة
وبيسالك قلبي الحزين

كنت فين
كنت مين
والدمع سايل من العينين
أنهار وجع
ونبض إتلع
هم وهلع
مع كلمتين.....
سرقوا منايا وفرحتي
زرعوا الغيامة في سكتي
يا دنيتي
قدر ومكتوب علي الجبين
أني أتوه في سكتك
تآسي عليا بدنيتك
يا فرحتك
لما الرموش إتحجرت
وأستغربت
من غدر السنين
كنت فين
كنت مين
كنت كلمة فرقتنا

وقسمت ضهر النهار
كنت سحابة ضللتنا
وحولت بيا المسار
كنت كهف جوه غار
كنت عتمة تشل دار
كنت أفاظ جرحتنا
وعصا ما تعرفش لين
كنت فين
كنت مين
كنت قيد أدمي الإيدين
كنت قيد أدمي الإدين

حبيبتى زى القمر

حبيبتى زى القمر
وخدودها يا ناس تفاح
تعشق عيونها السهر
وليلها لقلبي مراح
النظرة منها تاخذني
ألعن اللي عدي وراح
وأحس معاها بأني
طاير مسا وصباح
لا تقولي عنتر وعبله
ولا قيس ولا ليلي
هي للحب قبلة
والقبلة علي الشفاة سايله
تقولش بتنقط عسل
يملي بحور هايلة
ما أنا أصلي مرزق
وكل اللي بحبه متاح
الشعر تقولش طريق
أخره بساتينها

لا تحس معاها بضيق
والفرح في عيونها
أخ وحبیب وصديق
والقلب بیصونها
ما أقدرش أفارق جمالها
وأنا بین الرموش سواح
تعدي بیک البحور
لحد مراسیها
والوجة يشع النور
ترجع تلاقیها
فارشه بحنان الدور
والبسمۃ تحلیها
زي طبق بنور
تعیش معاه مرتاح
وریدی مربوط بها
والنبض علشانها
أجیب منین زیها
وهي الأدب زانها
عارفه كلام ربها
ومحفور علي حیطانها

دي دعوة أمي صحيح
أطير ومالي جناح
ست ستات البلد
ما يجوا رمش في عيونها
مستحمله ليالي الجلد
ما تقولش تعينها
وأن حالي مرة شرد
ألقاها تحسنها
وما تعرف سكة غضب
ولا صوتها علا بصياح
مفتاح قلبي في أيديها
وقادره تدوارها
فيه ما فيشي زاده
خير مالي دارها
ضابطة علي الفجر ميعادها
تقوم تبخرها
وكان الصبح عيدها
بيزيد في مقدارها

كلام وله معنى

كلام وله معنى
وبير المعاني غويط
الليل بيتوسم نعاس
إنشالله جنب الحيط
والحلم ليه إنداس
بسكينة سرقانا
يا مقسمين الدموع
نهارى ليه بيشيط
الخطوة ترجع ورا
مع ليل بيتسابق ويا كلام فشخرة
من الوهم ما هو لاحق
سفين بيد قصيرة
جوه الهموم راشق
والطل فوقه مندي
لكن ما طال الغيط
جربت أعيش منكسر
لقيت الكسرة شداني
أنى تملى أتحني

وأبقي واحد تاني
وأنسي أني معلم
ويركبني صبياني
أفتح لهم صدري وأستحمل التنطيط
يا دنيا ليه مسكنه
علي غصون الأمل غربان
ومنتوره في البحر
قروشك وحوش وحيتان
يهدوا علينا العش
وتبقي غش في غش
وقناع صلاح علي الوش
سوسه يطول البيت
حروف أغزلها شبك
يمكن تصيد بكرة
في جو حاله إرتبك
خلي العلم نكرة
حذف الألف واللام
بقت المياة عكرة
ما فاق من السكره
وسابنا لظيط ومعيظ

أخبار بلدنا

أخبار بلدنا الآن
خطوط جوه كام فنجان
وعرافين ما يفكوا رموز
لحقيقة ما راضيه تبان
في شاشات وليها العجب
خارسة وماليها لسان
وحروف وصابها التعب
علي قرطاس ورق بهتان
وعيون بتتوسم أمل
يجي ياخذها حصان
لأي فرصة عمل
إنشالله ويا شيطان
بس يفكوا النحس
ويلاقوا في البلد دي مكان
أخبار ومتكرره
تكره معاها اليوم

لوشوش وبالمنظرة
عن حقنا بتصوم
وخيبتنا كحكة مدوره
رامينها هناك ع الكوم
لما ريحتها فاحت
قلنا صحوا النوم

ليل وحزن ومطر

ليل وحزن ومطر...
وأرض الفرح شرقانه
الليل .. كاساته صبر
ودموع الحزن سهرانه
تعد حبات الخطر
وتنده علي بهانه
من ناس قلوبها حجر
وضمايرها نايمه عدمانه
لا حبة تيجي تبل الريق
ولا تنبت عمار لغريق
ساييانا نمد الأيد
ودايما عنها بعدانا
يا ليل مطول معانا
وسارق بسمتي ليهم
وسوط الظلم ورانا
مكفينا ببلاويهم

بشوف الكذب في عينهم
وأشوف عرقي حوالهم
فخليهم
وعليهم
بس يبعدوا عني
وأنا في الطل مستني
تقومي تمسحي عنيكي
ألاقي الولد متهني
وحقه شمس في إيديكي
وأفتكري تقربي مني
يا راكبه مركب الفاسدين
وأنا راكب حمار صبري
وعلي الشراع راكبين
وأنا جانح علي قبري
بيدوني شوية مجانيين
أوعي تقولي دا قدرني
أضحى بعمرني علشانهم
وهما علي الكفن دايسين

ولاد الكلب

ولاد الكلب غموني
وربطوني في ساقيه أدور
أروي أرضهم دمي
وأرضي من الألم بتبور
لا بلف وأنا راضي
ولا ليلى كان معزور
لكن دا حكم القوي
أني ما أشوف النور
أصرخ صرختي ترجع
بكام كرباج علي ضهري
ألاقي ركبتني تولع
لما أنقطم ضهري
ولا حتي خطوتي تشبع
وجسمي من التعب ينشع
حالتي والله ما أبشع
ويا ريتهم يحلونني
أنافق وأبقي من العايشين
أضلّل لجل أسد الدين

وَأُمِدْ أَيْدِينَ بِتَوْجَعَنِي
لِنَاسِ ظَالِمِينَ
بِيَاكُلُوا لِقْمَتِي عَنُودَ
عِشَانِ فَاسِدِينَ
أَطَاطِي لَجَلِ أَوْلَادِي
يَعْدُوا مِنْهَا بِسَلَامَةٍ
وَأَقُولُ يَا رَبِّ يَا هَادِي
نُورِ قَلْبِي بِعَلَامَةٍ
الْأَقْيِ الْفَجْرَ بِيَأْذَنِ
شَرَحِ الْقَلْبَ مَا اتَّحَزَنِ
وَشَمْسَ نَهَارٍ بِتَسْبِقَتِي
وَكَاسَ الصَّبْرِ يَلْحَقَتِي
أَفُوقَ مَنْ غَضِبَهُ مَا لَكَانِي
وَأَلَا قِي نَفْسِي مِنْ تَانِي
فِي دُنْيَا مَا سَيَعَانِي
لَمَّا أَنْجَبَرُ خَاطِرِي
مَشْ مِنْكُمْ يَا لَعِيبِهِ
يَا هُمُ وَغَمٌ عَلَيَّ شَيْبَةٍ
مَا أَنَا رَاضِي بِالْعَيْبَةِ
فَرَبِّي بِالْيَقِينِ سَاتِرِي

وطول ما بلف أفضحكم
وأقول دمي في رقابكم
ما عشت العمر أنصحكم
ومالت دنيتي بكم
يا ريت تسيبوا مطرحكم
وتغور لياليكم
كفاية لف أرجوكم
وحطوا حصوة في عينيكم

حكاية أغرب من الخيال

كان حب
زي جبال الثلج تمام
جوه قلب
دابت فيه مع الأيام
والقمره بايته تشتكي
والدمعة قايدة في سكتي
يا دنيتي
ليه عايشه في الأوهام
ومتشعلقة في حبال هوي
ما كان الدوا ولا كنا سوي
حاسين بحب زمان
أيام ما كنا بنحفر قلوب
علي سيقان الشجر
نجري ونطنط تحت المطر
والغلطة منا تغفر
حب إتحفر

لما العينين تيجي وتحضن بعضها
واليد تشتاق للحنان من حبها
والقلب كان بستان
طارح سنابل دنيته
مزروع في أرض أمان
تعزف بلابل بسمته
لكن دا كان
والحلم صابه الضياع
وخر جبل الثلج والقلب باع
والحب طار مع نوة غضب
والنبض مل من التعب
ويسأل نفسه ميت سؤال
دا كان محال
شمس حياتنا تغرب
ولا قلبه
عن قلبي حتي يتورب
لكن حقيقة وعشتها
في حكاية أغرب من الخيال
وكدة خلاص إفترقنا
وكتب علي جبيني البعاد

وخذ معاه
كل القساوة والعناد
ولا حتي عاد
بخطوة تصلح غلطته
أو وردة أشم عبيرها
حتي في سكته
وكات آخرته
يدوس علي قلب
كان متشوق حنين
علي كتفه شب
يرسم أحلام السنين
فالهجر دب
فجر دمعات الأنين
وسجن بقايا الحب
علي سطر في كلمتين
حزين يا قلبي علي اللي صابك
أيه من الحب نابك
وأنت تدم في الدموع
فارد قلوب علي أرض بور
ما نابته لقا بأحبابك

مربعات فن الواو

إياك فاكرها تكية
هتعبني منها وتأخذ
يا راجل كتك رزية
غير نصيبك ما تأخذ

أنا طول عمري جانبك
أقعد عد الجمائل
فليه الصبح جانبك
وغصن الود مايل

عشمتني بالحلق
خرمت أنا وداني
فليه ضميرك حلق
وبوعده ما أداني

حملت من همي
كل ضهور الركائب
ما تفوقي وتهمي
خلصت حدايا الزكائب

علي شطك دمعي قاعد
مستني بحارك
والموج عفي مقاعد
بتهد في بحارك

غرقان أنا فيكي
واليد عشمائه
تيجي تلافيكى
من كدية عدمايه

صحي نجوم ليالك
تيجي وتلحقتي
م الهم بشكيلك
بالوهم طال حقني

فين هي مرساكِ !؟

كان عيش وملح ولا
كان ضحك ع الدقون
يا أم الحنان قلة
وكل شيء ييهون
نار الغضب هاله
والصبر بقي مجنون
في ضهري ميت سلة
وفي يدي أيه بيكون
مشتاق وأيه ذنبي
في نهاري ما ألقاكي
وألقي الشموع جنبني
بتعيد في ذكراكي
من القهر متعبي
وأنا كلي برعاكي
مدي الإيدين يمي
غرقان في نجواكي

غريب وأنا في داري
وما دارية بأحوالي
بزحف في مجالي
وعلي ضهري أحمالي
لا السعد يوم جالي
ولا خدني لمآلي
ولا العيون شايفين
فين هي مرساكي
خدوني لميت عراف
وشربت فناجيني
جوه الخطوط أسعاف
مرسومه علي جبيني
لا يومي معاها إتشاف
ولا راضيه تأتيني
وقالوا ما فيش إنصاف
وأنا روعي في هواكي

دوزن يا عم

يا حلوة صحي النوم
العصر بيأذن.....
ما راح خلاص اليوم
علي قلب متحزن
الفجر شق هدوم
والضهر متأزم
أخذه لغروب محتوم
مع ليل ما متدوزن

رمياني مع شعرك ورا
اللهوي يشيل ويحط
وقلبي حالته متأخرة
والنبض عايش قحط
في عيوني شمعة منورة
خايف لتنزل تحت
وأنا مش قادر أقاوم
وجع الهدد والفحت

سیدی الحب

ما بلاش تتنك علي سيدك
وتبيع الورد اللي في إيدك
وتدوس علي شوكة بتنهيديك
فتجرح قلب كنت أنت مناه
مش سامع أه
والقلب يئن ويندهلك
جاي علي مهلك
ويا ريته يلاقي
في الحزن دواه
أو يلقي الشمعة النعسانة
تتنبه وتزيد في بهاه
أو يلقي القمر السهرانه
علي حصانها تاخذي معاه
يلم الجرح المتبعزق
أشواق في هواه
دا كنت سماه

والعش اللي الحب بناه
والوعد المكتوب علي قلبي
أني ما أنساه
دايما عن قلبي متخبي
ومستني أني أترجاه
وأروي أحضانه دموع
يمكن نلقاه
أو نلقي الليل المتربي
علي كل آساه
علي طول فاكراه
جوة الصورة المحفورة
قبل ما يبتهت قدامي
ويروح لقلوب بايعاه
ولو عد البحر أسامي
أيامي هتفضل شيلاه
فوق راس الحب اللي بيكذب
ويقول عشقاه
وإن تاه
ويا شفايف الزيف
أو حتي بيهرب كيف

ساعة ما ألقاها خريف
ترجع ثاني ذكراه
وأنسي الأه اللي في قلبي
وأنسي الحب في يوم وياه

لمين تبيع الورد ؟

رايح تبيع الورد
لحارة ما لاقية رغيف
وبينك وبينها سد
ونهار نهاره كفيف
لا عارفه تخطي الحد
والخطوة بالوجع تتمد
شاربه سراب ما هو جد
بتصرخ ما فيش يا لطيف
روح لناس عايشه
يمكن يشتروا منك
هنا الحارة بايشة
وما حدا سأل عنك
بلاش أفكارك الطايشة
ومتأكد هنا أنك
ممکن تبيع لبشر
نحتوهم في قلب خريف

إلى باعك دراعك

يا بني اللي باعك دراعك
وقلّعت في السفين مقلوع
ونهرك بيفيض بقهرك
وساكن جوه نبض خضوع
وراضي الذل يا صبرك
بتروي الإنكسار بدموع
لا تنتفض ولا بتهم
ومسلم للخطاوي رجوع
ولو سلمنا حد باعك
ما هو برضوا من خيبتك
لا توبه لفرحتك ساعك
وراسم بالسكوت شيبتك
لحد ما جاب قاعك
وتاه الحل لمصيبتك
بليد ما عندك دم
وراضي تعيش جربوع
الساكت عن حقه شيطان
يتهان لو ما يتكلم

والخائف ذا أصله جبان
عمره معاه ضلم
فعلشان تعيش إنسان
لازم الخطوة تتعلم
علي فين تمد
تجيب الحق يا معلم
وكفاية تولول كما النسوان
وتشقى توب سترك
وقول في مين عثمان
يا أبو صبر من جهلك
فيك أيه باقي كمان
ما حني بالوجع ضهرك
وأنت حساباتك غلط
ضيعت من حضنها مهرك

خيال سارح

خيال سارح لحد الدنيا ما تودي
وحلم حزين مصلوب هنا عندي
وريح عاتية ترجعني
لحيرة تملي تسبقني
علي موجة ما تلحقني
ولا أنت لعشمي بتهدي
خطاوي الحلم دبلانة
علي غصون الأمل مالت
عيونها ليل وسهرانه
لا طالت ولا نامت
من البسمة عطشانه
وكاسات صبرها قالت
خيالك حلم متأدي
في فنجانه الخطوط بانة
ويا ما أحلام ما ظهرت
ولا جوه العقول ماتت

من كثر غيظها إتفجرت
وقالوا عنها كانت
وفي أيامنا إتعصرت
ووقفت تاني ما لانت
مهما شربت الأوهام
تقول خلاص هانت
أقول معقول وأستغرب
وأدور في اللي عدي وفات
ألاقي الحلم بيقرّب
مهما بعدت المسافات
ومهما شمسنا تغرب
أو حتي نشيع اللي مات
نصر ربنا قرب
وفي عدله وميزانه آيات
يا حلمي غير العتبات
وأياك في حضن وهم تبات
دا الحاضر ما له علامات
لا تحاول ولا تجرب
ولا ترضي تعيشها سكات
وعن شرقك ما تتغرب

وغير في القصيد أبيات
وأوعي من نصها تهرب
وأضبط وهم الإيقاعات
وخلي الشمس تتشرب
دماء يأسنا فينا
وصحي الصبح بالصرخات
وصحي الصبح بالصرخات

غريب القلب

مين بس فينا الغلط
ومين غرقت مراسيه
ومين نهاره إتقرط
وما حد سمي عليه
عقد المحبة فرط
نسج الضياع حواليه
يا أم الرموش أمني
سايباني مختار ليه
وأنا وهبت القلب
ربيع مخضر في عينيكي
دق وشم الحب
علي شموع لياليكي
ساكنة الفؤاد واللب
ليه تاهت نواصيكي
وليه عشقتي غروب
وأنا شرقي يناديكي

وأنتى حبيبة الروح
منين ما أروح كما ضلي
وأنتى أساس البوح
ونهر الحرف بيصلي
ويدعي يخف النوح
والجرح صاب كلي
وبقيت غريب القلب
؟ليه مني بتملي
فيا تموت الحياة
لو شمسك غابت عني
والقلب يبكي مناه
والوحدة تحضني
ترسم خطوط الاله
علي توب قريب مني
فليه تهجريني
وموج قلبك ما يحملني

خلاص بطلت سياسه

خلاص بطلت سياسة
وهمشي جنب الحيط
وهقول للكل يا سيدي
أنا كنت بجد عبيط
ما أنا جاهل ناقص حنكة
ولحنكي خلاص سديت
وهقول للباشا يا مرحب
نورت حيطان البيت
إحنا ما نساوي من غيركم
وأنا بكم إتهنيت
بفطر حمام بالقشطة
لحد ما ملّيت
أحذف من كدري اللقطة
أني غضبان وبكيت
أو طلعت مني الصرخة
أو قلت أني إتهديت

سامحوني دي آخر غلطة
أنا كنت بجد عبيط
ما أنا جاهل ناقص حنكة
ولبقي خلاص سديت
الله يكون في العون
هنطبل مهما تكون
ربك بيسد ديون
وأنا وراكم صليت
وأيه يعني نمد الإيد
أو ندفع قرش زيادة
أنا اللي عقلي بليد
وزفارته فوق العادة
كاره كل التجديد
بيحب القهوة السادة
حتي في أيام العيد
معلش خلاص سامحوني
بجد طلعت عبيط
ما أنا جاهل ناقص حنكة
ولبقي خلاص سديت
هشغل نفسي بعيونها

وأَتَغْزَلُ فِي النِّسْوَانِ
أَشْرَفَ لِي أَبْقَى رُومِيو
وَأَعْزَفَ عَلَي الرَّمْشِ الْحَانِ
وَأَصْطَادُ فِي الْمِيَةِ الْعُكْرَةَ
قُلُوبَ صَافِيْنَازِ وَحْنَانِ
وَمُتَنَازِلَ عَنِ التَّرْكَةِ
وَلَا شَاعِرَ وَلَا فَنَانِ
يَجُودُ حَتَّى فِي ضَافِرِهَا
بَلَدِنَا أُمَّ الْجَدْعَانِ
الَّتِي رُبَّتْ أَوْلَادَهَا
مَا يَخَالِفُوا فِي شَيْءٍ سُلْطَانِ
وَيَطَاطُوا بِبُيُوسِ الْإِيدِ
وَلَوْ طَالُوا الرَّجْلَ كَمَا
فَخْلَاصَ رَتَبَتِ أُمُورِي
وَهَمْشِي جَنْبَ الْحَيْطِ
وَهَقُولَ لِلْكَلِّ يَا سَيِّدِي
أَنَا أَصْلًا كُنْتُ عَبِيْطَ

من دفاتر الثورة

شقلبوها ونيلوها
وقفلوا بأسوار الميدان
علي اللي ماتوا
واللي تاهو واللي كان
والدفاتر حرقوها الحريم
اللي بشناب الرجال
واتحزموا بمنديل لئيم
ورقصوا تانجوا علي الحبال
شييء محال ولا في الخيال
الشمس تشرق وجع
والليل كما طبال
بيدق علي الراس الهلع
والخوف خلاص بقي كاس
طبل هموم علي الراس
قافلين بميت ترباس
كسوف من اللي إتقلع
يا بياعين الكلام
نار الجشع سوقي

يا مهجرين الحمام
وسوط اللجام فوق
ما تفوقي يا أماااا
باعونا وباعوك ولا همهم وطن
وفي القهر دفنوكي
هيعمل أيه الصبر
في أرض شرقانه
ويعمل أيه الجبر
في لقمة عدمانه
خلص مداد الحبر
لغناكي يا بهانة
وماتت ضمائر التبر
وبالتبن سيقانا
هتحيأ فينا إزاي
وولادها بتفرفر
لا الطفل رضع اللبن
والشيب بيتعفر
وبكره شبابه حبل
عايش ما بيفكر
وكل دا كان ليه

لحيثانا تتغندر
الصرخة صرخت دفنوها

بكام قانون وقانون
والوقفة إحتجت لجموها
بقضبان حديد وسجون
والكرامة مغضوب عليها
والعيش بقي مسكون
بكل عفاريت الإنس
والجن يده ماعون
يا كل عسل علي الورق
كاسكوا ملان بمرار
من زيفكوا دمي إتحرق
وعايش في بور وبوار
لا نهار معاكوا شرق
والليل طلع بطل
والحلم منا آتسرق
قومي صوتي يـ أنهار

خالتي وخالتك

كات خالتي وخالتك
واتفرقوا بينا الخالات
أنت خالتك ست عفية
أبوها من نسل الخواجات
جوة قصورها تفشر وترقص
وغاويه لغة الدولارات
ولو حرنت لازم ترفص
وتعض حيطان الأبيات
وأنا خالتي ست محنية
حشروها نا بين اموات
وباعوها لشوية حرامية
لجل يشلوا لسانها سكات
كانت عايشاها بالنية
ولا ليها في الحال أمارات
واحدة فيهم دايسة الثانية
مع أن الاكنين أخوات

وإتقسمنا خلاص فريقين
واغرقنا ما بين شطين
إتعلمنا معني القسوة
ومعني الكره بدون قلبين
ليل ييمص في دم أخوه
ونهار يلعن يوم ما جابوه
ولا للود طريق ما رموه
ولا لقمة قسموها نصين
كل منا بينصف خالته
ولا عايش راضي بحالته
باصص في يد الثاني
ولا بالعدل رضاها ميزاني
الأول فلوسه شرياني
والثاني تايح وحزين
وكلنا أصول علي نيلها
وأن طببت كلنا بنشيلها
ليه بغرورك بتيلها
وتموت في قلوب عاشقين

عصر الوجع

أنا مش غاوي معارضة وبس
ولا خايف من أسكت هوس
كل ما أبني الطوب لمقامي
ألقي أحزاني تسبقتي ترس
ألقي العتمة في ضي نهاري
وألقي الوعد يزيد في مراري
وأنا متشرد ويا حماري
ولا ساقية بتلف الترس
مين هيطبطب خير علي داري
مين هيصحي في عيني نهاري
دي دموعي شلال لأنهارى
وأنت العين والقلب وبس
من صبرك شلت وحطيت
مرمي ممشمش جنب الحيط
وكراسيكي نازلين تنطيط
وهارينى من كتر الطس

بكرة بتاعهم ما نشفهوش
ولا في عيوننا سابولنا رموش
زي عصابة حلق حوش
و مخنوق وما عاد لي حس

طموح

كان ياما كان
كان واد فنان
بيصحي القمره النعسانه
لما أوتاره تعزف ألحان
وتلقي الحب بيجري في دمه
والنسمة جايه تجري تضمه
ولما يحكي يسلم فمه
تلقي حروفه تروي البستان
ولا قال عطشان
ومن بحر هواها أسقوني
ولا كان تعبان
لو شافها بترقص في عيوني
كان واد قنعان
لو حتي اللقمة ما كانت ليه
لا تحس بأنه جعان
ولا طمعه مد أيديه

ويا عيني عليه
لما الفجر إدن وإنساه
صلي وراه كل اللي معاه
وإيديه بالفقر محنيه
لكن كان طاقة حنية
البسمة ما تفارق فاه
وقناعته ضليلة وراه
وعيون الدنيا شايفاه
وبيداري وجعه في جلبية
علي حيطانه تلقاه محفور
صورة وما ليها ملامح
لكن منها يشع النور
وما تعرف علي فين رايح
كان فعلا في ليل مقبور
ونهاره برضاه مسرور
من ميت عتمة طلع منصور
بإصراره أن يكون فالح
أتعكر علي وجع الأهه
لما بحلمه قام ونداها
فتحت سكة كل نداها

وشموسه طلعت وياها
والدمعه دابت في مساها
وأحلو البحر المالح
علي أيه طافح فينا لسان
راح فين زمن الجدعان
إن مالت ميل علي أيدك
وآن عزلت
أغزلها في بيتك
وإن عابت
علي أيه ربيتك
دا أنت مخلوق إنسان

واد متغندر

كنت صغير واد متغندر
فاتح قلبي لغاة ما يشيب
يعشق واحدة
ويخطب واحدة
وما فيش ولا واحدة
هواها قريب
واتكعبلت صدفة في واحدة
خلت كل نهاري يخيب
لا بتغندر
ولا بتعنتر
ولا حاسس بأني حبيب
قفلت قلبي عليها بضبة
والمفتاح طبعا وياها
من نظراتها أقوم أتخبي
وأتحجج بنصيبي معاهأ
لكن قلبي بايت برة

وبفر فر أوجاع في سماها
وكانت فاكرة بأن الغيرة
هي الحب وهي دواها
ولو واحدة ظهرت في السيرة
تركب حيرة لحد بكاهها
أمسح دمع عينيها بقلبي
تمسح حبي بميت أستيكه
أقعد أهدي في نفسي وأخبي
لحياتنا ألقاها مزيكة
لا حنانها كان ساكن جنبي
وشجارها يقلبها حريقة
طفت كل الشمع في قلبي
وكل جيرانا يقولوا بريئة
معقول يبقي الجاي دا ذنبي
ولا الجهل عيونه جريئة
معقول أتشال من دربي
للوحدة وليالي الضيقة
وألقي شמוש الحب في قلبي
لا هي عاشقة ولا حتي صديقة

شيل معايا

شيل معايا أشيل معاك
ولا نقطنا بنهار سكات
لما قلبي قام ندالك
ليه دوست ع اللي فات
وليه عيوني ما هم في بالك
ولا نبضك راضي لوصالك
ولا حتي شوقه مكتوبالك
كلها بس حكايات
في الهوي تدمع عينا
والحقيقة ما حاسة بينا
ليه يا قلبي جاي علينا
وليه نبقي ذكريات
شيل معايا نعدي ليل
وخلي شمع الحب ضي
دا الخطوة في القلب ميل
وحنانه ما لو زي

نبضه حي
وما في شيء
في قلبي غيرك دليل
دلني لسفين مراسي
وأنقذني من هم كاسي
وأوعي ليلك يبقي قاسي
يغرقني في عذاب وويل
مستحيل
الحب يهجر قلبي الحزين
وينسي أحضان السنين
وما أعرف حتي فين
قلبك مع مين يميل

نويت أبطل كتابه

نويت أبطل كتابه
وأشتغل للرقصات طبال
وأهرب من جحور الديابة
يمكن تتعدل لأحوال
وألقي لي مكان في غابة
حلمي فيها متشال
هو وكل الغلابة
اللي شربينها ضلال في ضلال
وفي عتمة كدابة
ما مدت أيديها لعيال
بطونهم بتتوسم شبع
مع رنة الخلخال
وعينيهم بتبكي وجع
في يوم ومالو مآل
وهدوم بتصرخ هلع
وما لاقيه كلام يتقال

لسانها فيها إتبلع
والحلم منهم ضاع
خليني أطبل يا خال
أحسن ما أكون بياع
أبيع حروفي ذل
وأطاطي لأي بتاع
يرمي لنا عضمة
نحتوها حيتان وسباع
وقلمي في الضلمة
معمول له فرش متاع
ما هو ما لاقى مداده
ولا حد لقوله إنصاع
ما هز الوسط موضدة
ترفعك وتبقي شراع
وتغير حيطان قوضة
ولقمة عليها صراع
وننسي قانون فوضي
عائش بفرد دراع



يا حطة كحل

يا حطة كحل في عينيا
صحت نهاري يشوف
مين اللي بيلعبوا بيا
ومين المستغطي خوف
سمارك شمس رباني
كشفت كل خير مسفوف
سافوه ولاد بلدي
بلا تقوي ولا معروف
دموعك علي الخدود ندي
وردة حلمها مقطوف
رفعت سيقاتها مدي
للفجر لجل تطوف
جوه بساتين عمرها
تروي الزهور بسمة
ونسمة بتضمها
من غير خجل وكسوف
مسحوها من عيني غدر
فصرخ ضياء البدر

لما ما لاقى صدر
يطبطب يا عيني عليه
مبصر كفيف مسحوب
من العتمة بأستغرب
مشونا بالشقلوب إلي ضياع قرب
مش فاهم أسأل مجرب
أو عن ضياعنا توب
يا عيون ومتكحله
وما واصله ضيا لنا
يا نسمة ومتربه
بتبكي ليالينا
يا فرحة ومغربه
ومستكترها العناد فينا
خلوا المسافة قريبه
توصلنا لأمانينا
وخلوا الكلمة الطيبة
تزوق حرف أغانينا
وأمسحوا الغشاوة المتعبه
وخذونا لبر يحميننا

حق الغلابة

حق الغلابة فين
يا مطيارين عقلي
أكتفيتوا بالرغفين
ويا وجع ضهري
أنده وأقول باللين
يا بلدنا فين حقي
يقوموا يظهروا الحلوين
يقفلوا بكذبهم بوقي
وميزان العدالة سراب
وكلاب تعض الباب
ندفن بطون أحباب
ويا سنين عمري
من ريس لريس
لكام ريس ما راسانا
لا الموج معانا كويس
ولا ريح البحر عدانا
والمركب بتطوح
بيننا شمال ويمين

أمتي لنهارنا نروح
يا أم الولاد مساكين
ونغسل هموم الطين
ويسكر مرار حلقي
أقفلوا شاشات النفاق
اللي رسمينا بنغني
وطايرين من كتر الفرح
والكعب متحني
والصدر معاه أتشرح
يرقص يقول سلامات
يا شلة العاهات
أنا مش في البلد ملقي
ولا جنسيتي عبري
ولا إنسان مالوش قيمة
أنا اللي باني الهرم
ليه أتحرم قيمة
وأنا نسور العلم
والساري والألوان
فإزاي أبات متهان
وتموت شמוש شرقي

يا مطبلين للكراسي
علي راسي تدق طبول
أصرخ أنا وفاسي
وعرقنا يقول معقول
بتهدوا في مراسي
لحد ما جاه الدور
علي شقا عمرنا
وتزيد جراح حرق
مجنون وراح العقل
من كتر الهيام فيكي
لزومه أيه التقل
وماشية مغمضة عينيكي
كسرتي ليه السهل
ودوانا بأيديكي
وزرعتي غيطان الجشع
تسرق فينا وفيكي

مسكين

مسكين ياللي تطاطي
وتقول راح ه تعدي
وتعدي علي الظهر واطي
نهار أمه ما بيندي
وكل ما أقولك قوم
تخاف من السجان
ومرمي علي الكوم
ورحكتك هنا عندي
ليلك مريض بالخوف
وشمسك طاله مرعوبه
بكرة يجي وتشوف
الحلوة مخطوبة
لا هينوبك منها
غير شوية نظرات
تحكي كثير عنها
ما ترد عليك سلامات



نايمه في حضن الغريب
وأنت في همها بتبات
وتقول يا ناس توبة
بطلت أقول من دي
ما أنت اللي كلك غلط
بالع لسان يومك
تمضغ جبال الزلط
وتشوق في هدومك
والصبر حبله إتفرط
هد عليك كومك
وماشي ليه خرسان
علي الخطوة بتهدي
قالوا عليك مسكين
وبالمسكنه ماشي
لا أنت مالي العين
ولا عايشها بوليشي
حتة حساوي حزين
علي أيه ما ترضاشي
علي الدبح بالسكاكين
ساعة الموزة ما تعدي

يا بني مش دنيته
دي دنية الفاجرين
اللي يبيعوا الميا
في حارة السقاين
ويبيعوا الهوي في أرايز
ويروضوا التعابين
وأنت مجرد نفس
ملامحه أكيد هندي

دستور يا أهل الدار

وحياة مقام السيدة
لـ تلبسنا كلنا طراطير
وتركب حصان الفهلوة
وتغير الدساتير
ما الطبل أصله غبي
بكرة من الغباوة يشيل
لما الجمل يبرك
وينشف حليب الزير
فخلي مجلسك يحرك
ويكملها مشي ضرير
وإحنا في الإيدين نفرك
وما لنا في الهوس تعديل
مين قال أن دي دولت
وهي علي الهوي بتميل
لو هي ماشيه كده
تبقي الامور كوسة
نلعب في دا وده
ونقول دي محروسة

يا عم طلعت عينينا
من الوكسة والحوسة
شلوا لسانا وإيدينا
في ليل غاوي تضليل
دستور يا أهل الدار
مين فيكوا كاشف راسه
ومين يدق الزار
يطرد شيطان كاسه
ومين يشيل العار
لو ناسوا إنداسوا
ولا نصيبنا كده
نعيش بقر وحمير
مسيرها تحلي يا فارس
بس أمسك لجام خيلك
دا الريح جاي كانس
أوعي يشل تفكيرك
ولا الهوي يعميك
وتعوم مع العايمه
دا لسه الحياة نايمه
في حضن ما هو أصيل

المعنى فى بطن الشاعر

المعنى فى بطن الشاعر
وأنا شاعر فى بطني كثير
ألضم حرفى قوة بتعافر
والآخر مشواره طويل
لا جناحه يطير ويسافر
وبيصرخ من واقع كافر
نفسى يربى أنياب وضوافر
وعن حقه أبدا ما يميل
ولا يستنى الليل بمراره
ولا نهاره يغرق فى البير
خط الهم واصل لمداره
وداره على عتمة ليل
ما شاف الهنا فى نهاره
ولا أبدا فى سماه بيطير
منتوفه جناحه يا عيني
بالزفة وكتر التهليل

وكسوفه من كثر العفة
عافه عليه ناس مهابيل
بيلعبوا بمصيره الرفة
والدفة ما هي راضيه
تسير
وكل ما تجنح لنا عدالة
تقابلها زعابيب أمشير

محاكمة سكوتي

أنا كتفت سكوتي بخوفه
جوه نهارنا المجني عليه
يا شاهدين لمحاكمته شوفوا
حكم العقل هينطق أيه
جوه الساحة ميزان لعدالة
والأوراق بتهم حماله
ودفاعه ما هو لاقى قوالة
لقلب العقل يحن اليه
فتصرخ ليه
وتبكي ليه
وأنت الهم لحالي الشاكي
وأنت هاطل دمعي الباكي
وأنت الصبر
وأنت الجبر
وأنت الليل اللي مقيدني
ولا شايف دمعتي بعنيه

شوف بدفاعك
هتقول أيه
مطاطي لجل أعديها
وولادي من راح يحميها
والدنيا راحة جاية عليها
وسكوتي مقيدين رجليه
يا ما قبلي قالوا وعادوا
إتقيدوا ولينا ما عادوا
يمكن ما جاي ميعادوا
أحبس صمتي في بير يتاويه
والله يا باشا
غصب عني سكوتي عليه

إلبس عباية ضميرك

ألبس عباية ضميرك
وأعمل اللي عليك
وأرضي قناعة برزقك
وبوس ظهر ووش إيديك
وأنت ما عليك
في رب مسيرها
ومهما الليل يغيرها
يجي الصبح ينادي عليك

يا سكة العاشقين

أنا قلبي رافض يكتبك
غنة ألم مع ناي حزين
وقلمي من كتر التعب
يرسم حروفك وطن
سلطنة المواويل
علي حوافي الحنين
رافض يكون الموج حصار
يبلغ خطوط الرسم
والنغمة تهرب من الأنين
ما أنا وأنت صحيح أكنين
لكن نبضنا واحد
وبينا بحور الشوق
ما تكفي يوم واحد
فإزاي في يوم واحد
يشقنا الغضب نصين
رافض تكوني ليل

وأنا الدمعة علي خدودك
تطفي نور الشموع
وما أعدي لحدودك
أستني جواز السفر
لنهار يمضي عليه
وأنا مهما طال إنتظاري
ما أتمرجح ما بين قلبين
يا سكة العاشقين
إفردني جناح ليها
هاتي بساط الريح
ياخدني لعينيها
أنا قلبي مال وجريح
ودوايا في إيديها
وإن شوفت البدع تباريح
في حضن القلب أحميها

جوه القلب

ما أقدرش أقول غير أنها
حتة جوه القلب دافية
وأن غصب بـِ عدت عنها
ألقي عيونها جايه حافية
فارده شراعها جوه قلبي
والبسمة هاله نور لدربي
هي حبي وهي نبضي
ولجراح البعد شافيه
أرسمها علي الجبين آيه
وكتاب للشموس مفتوح
ومد الشوق ما لو نهاية
ولقلمي مداد البوح
شمعة حب سهرايه
تنور لي منين ما أروح
نعمة ربنا معايا
ما أشوفها في ليل طافيه

صباح نادي في ملامحها
تسر القلب وال خاطر
سفيني هي ملاحها
وعلي الدفة أنا شاطر
أفادي النوة والأعاصير
وأنا وهي في بعض نظير
ونعدي ضلام الليل

وعلي المرسى أقول حاضر
تشوف الود في أيديها
لما نكون ببنتمشي
تقول يطول لياليها
وخلي الفجر يتعشي
نجوم مبدوره حوالها
قمره والله ما ليها زي
أقول يارب أحميها
من عين الشر والناظر

الديك

كل فجر وله آدان
أصحي إدن يا ديك سطوحنا
ولا لسه الخيط ما بان
وإحنا نايمين جوه روحنا
دا خلاص الوقت حان
نقوم نتوضي بجروحنا
ولا غيرت المكان
وهديت نصبة فرحنا
أنت ديكننا وديك أبونا
واللي جابونا مستنينك
ليه تطير من فوق سطوحنا
قوم يا ديكننا قولي فينك
ياللا كاكي بالآدان
سمعنا نغمات زمان
كل فجر وله آدان
وأنت ليه غمضت عينك



عدي على دور الغلاية

عدي علي دور الغلاية
وأرسمي علي الحيطان بسمات
صحي العيال من الوجع
وطبطني علي اللي فات
وخديهم لدنيتك أمل
ونوري بهم ما آت
دا الصبح لو يشرق
هتكون ضمتك علامات
والليل بعيد عنك
بيألف الإشاعات
مره يقولوا دي ناسيه
ويقولوا فقيرها مات
ومره يقولوا دي قاسية
وباعوها للخواجات
ومره يقولوا فينها
ودمع عيونها أهات

وناس بالظلم راكبينها
و ناس ما لاقيه فتات
أرد أقول علي عينها
كترت فيها العلات
من اللي صابه الجشع
ونار الفساد بالذات
واللي يبيعوا الضماير
وينوروا الفيلات
بدماء شعب ثاير
ما لاقى لفعلهم حسنات
عدي وشوفي ولادك
وحصنيهم إيمان وأيات
وطمنيهم علي بكرة
مش بكرة اللي فات
يا مصر مش نكرة
فقرا ودمهم شربات
بالنكتة بيرطبوا
الصعق بالصدمات

غرقت في بحر الحروف

غرقت في بحر الحروف
أنشل كلام عامي
وقلمي ملاه الخوف
لجل ما يفهمه عمي
زي كلام كثير
علي الشط مترمي
لا قادر جناحه يطير
ومعني القصد متغمي
طلعت بيه علي الموج
سالت دموع يمي
فردت شراع همي
غرب بعيد عني
والريح واخذانا بالدرع
يا عقولنا ما تضي
حروف تتكتب إبداع
يعيروها بمقاس كمي

والكيف جوه الكفن
وما حد بص عليه
مالي ضهور السفن
ومربطين رجله
ولا أتفهم وجعته
بين السطور ماشي
لحد يوم دفنته
قالوا خلاص أرمي
وقفوا نقاد الأدب
ياخذوا عزا حروفي
مع سطر صابه التعب
من كتر نوح بوحي
يا مركب الغرقى
غوري هناك روي
معايا مش فارقة
ولا أنزل بحر فيه سمي

عبيط

كله بيطل في المطبل
ليه ... عليا بتستهبل
هو أنت فاكرني عبيط
ولا بس جلبيتي بالشقلوب
وبشخر جنب الحيط
مستني حد يقومني
أو طبله تيجي تفهمني
من أمتي جاي تعزمني
علي طبله طبالها حويط
هيرقص
علي واحدة ونص
والمسرح
في فلوسنا يرص
والحالة
عيونها تبص
ورموشها

علي الطبل تشيط
كنت معايا بجد يا صاحبي
ببير وغويط
وأنا ما أشبهش ليوסף
ولا دق طبولك أنقذني
لكن أتبعث بثمان بخس
أخس
عليك زمن الوطاويط
كل حاجة فيك بجنية
كله بيعرف
كله بيعرف علي أوتاره
لحن البيه
وأياكشي بيداري كسوفه
يجي مرة ويمد كفوفه
أو حتي يجي يغطيني
لجل ما أطول جوه البير
وزي ما قالوا أبقى عبيط
طبل أنت علي أغصانك
وطير من عليها العصافير
لا إيديك هتمنع مطرا

ولا أنت بالطبل قدِير
لكن عارف أيه هيصير
لما تلاقي الطبل معلق
علي كل حيطان البيت

أنا كتفت سكوتي

أنا كتفت سكوتي بخوفه
جوه نهارنا المجني عليه
يا شاهدين لمحاكمته شوفوا
حكم العقل هينطق أيه
جوه الساحة ميزان لعدالة
والأوراق بتهم حماله
ودفاعه ما هو لاقى قوالة
لقلب العقل يحن اليه
فتصرخ ليه
وتبكي ليه
وأنت الهم لحالي الشاكي
وأنت هاطل دمعي الباكي
وأنت الصبر
وأنت الجبر
وأنت الليل اللي مقيدني
ولا شايف دمعتي بعنيه



شوف بدفاعك
هتقول أيه
مطاطي لجل أعديها
وولادي من راح يحميها
والدنيا راحة جاية عليها
وسكوتي مقيدين رجليه
يا ما قبلي قالوا وعادوا
إتقيدوا ولينا ما عادوا
يمكن ما جاي ميعادوا
أحبس صمتي في بير يتاويه
والله يا باشا
غصب عني سكوتي عليه

ماعاش إلى يزعلك

قولوا: إنك عجزتي
وظلعتي يا قلبي معاش
معقول القلب يعجز
ونهاره لسة ما جاش
ولا شمس الحب لحقت
توفي ما عليها من الدين
ولا أرض أشواقي جفت
فيا لأجمل عينين
دا الباقي يا روعي كثير
جوه النبضات متحاش
ولسايا بحبي بطير
وأكتب فيكي الأساطير
إياكي فاكركه الليل
غير قلب لحبه ما عاش
ما تعدي إنشالله سنين
لا تأثر فيا وفيكي

أيه يعني كبرنا يومين
يا ستي مدي إيديكي
إحصدي من قلبي حنين
لأجمل سهرات لياليكي
وشريط العمر يعدي
وحلاوته لما يهدي
ألقاكي كساتي وشهدي
ولدمعة عين ما ألقاش
سيبك دا كله روتين
شماعة لناس مجانيين
فاكرين العمر سنين
بنعدي منها بلاش
تعالى بأجمل طرحة
ومراية وزفة وفرحة
الشمعة بضيها سارحه
لا في يوم هنشوفها تعجز
ولا تخرج منا معاش

محال قلبي ينساها

عدي عمري وما نسيتك
ولا راح اللي كان بينا
ولا شوقي نقص حته
ولا نبضي وقف سنه
رميت الشوف مدد ليكي
نسج الحب حوالكي
ومهما البعد بكي عيون
طيفك في القلب متحني
يا حب حياتي يا عيوني
يا أول نبضه حسيتك
فين أنت وأنا فيني
وليه الغيرة بكيتك
وقلعت ضي خطاويننا
بوهم ما كان خالص لينا
بني مرسى لليا لينا
وأنا غرقان ومستني
بقاوم كل موج ظني
وقافل قلبي ما فتحتوش

عائش علي الذكري متهني
وألم الجرح ما نستهبوش
بحاول أزوغ أنا منه
ولا بسأل ساعات عنه
لما شوقي يغلبني
وطيفها يكون قريب مني
أفرش ليلى بكلامها
يتوه العقل في هواها
أقول يمكن وأقول جاوز
وأقول أنا لسه بهواها
وأقول باعت
وأقول خانت
وأقول أنا روعي وياها
ومهما عدت الأيام
محال أنا قلبي ينساها

يا قلبي لا تحزن

يا قلبي لا تحزن
على اللى باعوك ببلاش
فبلاش النبض يحرن
على اللى راح وما جاش
سقيته من شهد حبي
وزعت العيون بساتين
وفردت الرموش جنبى
حب وشوق وحنين
ونورت بسماه دربى
وشلته فى نين العين
هجرنى أنا وانت
فى ليل طويل وحزين

أركب سفينة النجاة
وأبعد بعيد عنه
ما كفاية وأنت معاه
ما لاقيته فى يوم أنه
خايف عليك من الهوى
وركب سفن ظنه

لا كان فى يوم الدوى
ولا عيونه كانوا راحمين

بإيه يفيد الحب
والقلب قايد نار
مرمى فى قاع الجب
لا سكن ولا دار
يدور كما ساقية
ما تروى أرض شرقانه
واخذها بالعافية
على نبضة دبلانه
تشرق شمسها ويل
تعض فيك لسنين

أفرد جناحك أمل
وأوعى تبص وراك
بكرة الجراح تندمل
وتلاقى قلب معاك
يسقيك كاسات الحب
ويداوى بالنظرة
كل ليالى الكرب

وتفوق من السكره
وعلى حنائه تشب
لتموت من الحسرة
أو تبقى درويش
تنوه مع التايهين

سيبك من مكر العيون
والغمزة والهمسة
دا أخرها طريق ملعون
محروم من النسمة
تلف بيبك الكون
تلقى القلوب عتمة
وتأخذك لدرب هلاك
ما ملاك يصون حبك
أو شمعة فى ليل وياك
تطبطب على وجعك
أحذر يا قلبى أياك
تركب هوى شططك
وتغرق مع موجة
وما نعرف لفين رايعين

محتويات الكتاب

| | |
|----|----------------------|
| 2 | بطاقة الكتاب |
| 3 | قبل أولف قصيدة |
| 4 | الإهداء |
| 5 | العيون دى مصرية |
| 7 | لو مفيش غيرك حبيبي |
| 10 | يا حته منى |
| 12 | الظلم موضه عصرنا |
| 14 | أطلق سراح الخيال |
| 17 | سمات العصر |
| 19 | كنت فين |
| 22 | حبيبتي زى القمر |
| 25 | كلام وله مهنى |
| 27 | أخبار بلدنا |
| 29 | ليل وحزن ومطر |
| 31 | ولاد الكلب |
| 34 | حكاية أغرب من الخيال |
| 37 | مربعات فن الواو |
| 39 | فين هيه مرساك |
| 41 | دوزن ياعم |

| | | |
|----|-------|----------------------|
| 42 | | سيدى الحب |
| 45 | | لمين تبيع الورد |
| 46 | | إلى باعك دراعك |
| 48 | | خيال سارح |
| 51 | | غريب القلب |
| 53 | | خلاص بطلت سيتسة |
| 56 | | من دفاتر الثورة |
| 59 | | خالتى وخالتك |
| 61 | | عصر الوجع |
| 63 | | طموح |
| 66 | | واد متغدر |
| 68 | | شيل معايا |
| 70 | | نويت أبطل كتابة |
| 72 | | يا حطة كحل |
| 74 | | حق الغلابة |
| 77 | | مسكين |
| 80 | | دستور يا أهل الدار |
| 82 | | المعنى فى بطن الشاعر |
| 84 | | محاكمة سكوتى |
| 86 | | إلبس عباية ضميرك |
| 87 | | ياسكة العاشقين |

| | |
|-----|--------------------------|
| 89 | جوه القلب |
| 91 | الديك |
| 92 | عدى على دور الغلبة |
| 94 | غرقت فى بحر الحروف |
| 96 | عبيط |
| 99 | أنا كتفت سكوتى |
| 101 | ماعاش إالى يزعلك |
| 103 | محال قلبى ينساها |
| 105 | ياقلبى لا تحزن |
| 108 | محتوى الكتاب |